
OFFERYNNAU STATUDOL CYMRU

2020 Rhif 623 (Cy. 143)

ADDYSG, CYMRU

Rheoliadau Addysg (Trefniadau Sefydlu ar gyfer Athrawon Ysgol) (Cymru) (Diwygio) (Coronafeirws) 2020

<i>Gwnaed</i>	- - - -	<i>22 Mehefin 2020</i>
<i>Gosodwyd gerbron Senedd</i>		
<i>Cymru</i>	- - - -	<i>23 Mehefin 2020</i>
<i>Yn dod i rym</i>	- -	<i>15 Gorffennaf 2020</i>

Mae Gweinidogion Cymru yn gwneud y Rheoliadau a ganlyn drwy arfer y pwerau a roddir iddynt gan adrannau 17 a 47(1) o Ddeddf Addysg (Cymru) 2014(1).

Enwi, dod i rym a dehongli

1.—(1) Enw'r Rheoliadau hyn yw Rheoliadau Addysg (Trefniadau Sefydlu ar gyfer Athrawon Ysgol) (Cymru) (Diwygio) (Coronafeirws) 2020.

(2) Daw'r Rheoliadau hyn i rym ar 15 Gorffennaf 2020.

(3) Yn y Rheoliadau hyn, ystyr "Rheoliadau 2015" yw Rheoliadau Addysg (Trefniadau Sefydlu ar gyfer Athrawon Ysgol) (Cymru) 2015(2).

Adolygu rheoliadau 5 i 9 a pha bryd y deuant i ben

2.—(1) Rhaid i Weinidogion Cymru adolygu effeithiolrwydd rheoliadau 5 i 9 yn ystod y cyfnod y maent yn cael effaith.

(2) Yn ddarostyngedig i reoliadau 3 a 4, mae rheoliadau 5 i 9 yn peidio â chael effaith ar 31 Awst 2021.

Darpariaethau arbed

3. Pan fo person yn ymgymryd â sesiwn dysgu proffesiynol sy'n bodloni amodau rheoliad 7A o Reoliadau 2015 (fel y'i mewnosodir gan reoliad 7) yna caiff sesiynau o'r fath gyfrif tuag at gyfnod sefydlu'r person hwnnw fel pe baent yn sesiynau ysgol ar ôl i'r Rheoliadau hyn ddod i ben ar yr amod bod uchafswm o 18 o sesiynau o'r fath.

(1) 2014 dccc 5.

(2) O.S. 2015/484 (Cy. 41).

4. Nid yw'r ffaith bod rheoliadau 5 i 9 o dan reoliad 2 wedi dod i ben yn effeithio ar ddilysrwydd unrhyw beth a wneir yn unol â'r darpariaethau hyn cyn y dyddiad dod i ben.

Diwygio Rheoliadau 2015

5. Mae Rheoliadau 2015 wedi eu diwygio fel a ganlyn.

6. Yn rheoliad 3(2)(b) ar ôl "(gan gynnwys, yn unig, gyfnodau o gyflogaeth sy'n cyfrif tuag at gyfnod sefydlu o dan reoliad 9)" mewnosoder "neu reoliad 8(5) (penderfyniad corff priodol pan fo'r safonau wedi eu cyrraedd)".

7. Ar ôl rheoliad 7 mewnosoder—

"Dysgu proffesiynol a gaiff gyfrif tuag at gyfnod sefydlu

7A. Caiff sesiwn dysgu proffesiynol y mae person yn ymgymryd ag ef gyfrif tuag at gyfnod sefydlu'r person hwnnw pan—

- (a) ymgymerir â'r sesiwn dysgu proffesiynol rhwng 26 Mawrth 2020 ac 31 Awst 2021,
- (b) bo'r sesiwn dysgu proffesiynol yn isafswm o 3 awr (boed yn olynol ai peidio), ac
- (c) bo'r sesiwn dysgu proffesiynol wedi ei gymeradwyo gan y corff priodol."

8. Yn rheoliad 8—

- (a) Ym mharagraff (1), ar ôl "a (4)" mewnosoder "a (5)";
- (b) Ar ôl is-baragraff (3)(e) mewnosoder—
 - "(f) pan fo paragraff (5) yn gymwys.";
- (c) Yn is-baragraff (4)(b) yn lle "ym mhob achos arall" rhodder "pan fo paragraff (3)(a), (b), (c) neu (e) yn gymwys";
- (d) Ar ôl paragraff (4) mewnosoder—
 - "(5) Caiff y corff priodol, gyda chydysyniad y person o dan sylw, leihau hyd y cyfnod sefydlu y mae'n ofynnol i'r person ymgymryd ag ef i isafswm o 110 o sesiynau ysgol os yw'r corff priodol wedi ei fodloni bod y person wedi cyrraedd y safonau a grybwyllir yn adran 18 o Ddeddf 2014.
 - (6) Ym mharagraffau (4) a (5) caiff "sesiwn ysgol" gynnwys sesiwn dysgu proffesiynol sy'n bodloni'r amodau yn rheoliad 7A.
 - (7) Ni chaiff y sesiynau dysgu proffesiynol a gaiff gyfrif fel sesiynau ysgol fod yn fwy na 16% o hyd cyfan cyfnod sefydlu."

9. Yn rheoliad 13 (cwblhau cyfnod sefydlu) —

- (a) Ar ôl is-baragraff (1)(b) mewnosoder—
 - "(c) os yw'r person hwnnw wedi ymgymryd â sesiwn dysgu proffesiynol y cyfeirir ati yn rheoliad 7A pan gwblheir y cyfnod sefydlu."

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn diwygio Rheoliadau Addysg (Trefniadau Sefydlu ar gyfer Athrawon Ysgol) (Cymru) 2015 (O.S. 2015/484 (Cy. 41)) ("Rheoliadau 2015"). Mae Rheoliadau 2015, ynghyd ag adrannau 17 a 19 o Ddeddf Addysg (Cymru) 2014 ("Deddf 2014"), yn ymdrin â'r gofynion i athrawon ysgol ymgymryd â chyfnod sefydlu.

Mae rheoliadau 3 a 4 yn darparu y bydd rheoliadau 5 i 9 yn parhau i gael effaith ar ôl i'r Rheoliadau hyn ddod i ben o dan amgylchiadau cyfyngedig sydd wedi eu rhagnodi. Fel arall, bydd y Rheoliadau hyn yn dod i ben ar 31 Awst 2021, fel y darperir ar ei gyfer yn rheoliad 2.

Bydd yn ofynnol i Weinidogion Cymru adolygu effeithiolrwydd y Rheoliadau hyn yn ystod y cyfnod y maent yn cael effaith (rheoliad 2).

Mae'r Rheoliadau hyn yn diwygio Rheoliadau 2015 mewn dwy ffordd:

- (1) Maent yn caniatáu i'r corff priodol leihau'r cyfnod sefydlu y mae'n ofynnol i'r person ymgymryd ag ef i isafswm o 110 o sesiynau ysgol ar yr amod bod y person yn cydsynio (gweler rheoliad 8). Bydd yn dal yn ofynnol i'r person gyrraedd y safonau a grybwyllir yn adran 18 o Ddeddf 2014.
- (2) Mae rheoliad 8(d) yn mewnosod rheoliad newydd 8(6) a 8(7) yn Rheoliadau 2015. Mae'r rheoliadau yma yn caniatáu i sesiynau dysgu proffesiynol gyfrif tuag at gyfnod sefydlu person, ar yr amod bod y sesiynau hynny yn bodloni'r amodau a nodir yn rheoliad newydd 7A (gweler rheoliad 7). Ni chaiff y sesiynau dysgu proffesiynol hynny fod yn fwy nag 16% o hyd cyfan cyfnod sefydlu.

Ystyrir bod y Rheoliadau hyn yn angenrheidiol am ei bod yn bosibl na fydd athrawon newydd gymhwyso wedi gallu mynychu ysgol er mwyn cwblhau eu cyfnod sefydlu yn sgil lledaeniad coronafeirws syndrom anadlol aciwt difrifol 2 (SARS-CoV-2) yng Nghymru.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth gangen Addysgeg, Safonau Proffesiynol a Safon Uwch, Is-adran Addysgeg, Arweinyddiaeth a Dysgu Proffesiynol, Llywodraeth Cymru, Parc Cathays, Caerdydd, CF10 3NQ neu inductioninfo@llyw.cymru.